

17 FEB 1998

DR MAHATHIR AKAN MELAWAT BRUNEI ESOK

KUALA LUMPUR, 17 Feb (Bernama) -- Perdana Menteri Datuk Seri Dr Mahathir Mohamad akan melawat Brunei esok untuk membincangkan keadaan terkini ekonomi dan kewangan di rantau ini dengan Sultan Hassanal Bolkiah.

Dr Mahathir akan diiringi isterinya Datin Seri Dr Siti Hasmah Mohd Ali, menurut satu kenyataan Kementerian Luar hari ini.

Lawatan sehari ke Bandar Seri Begawan itu merupakan sebahagian daripada siri pertemuannya dengan para pemimpin Asean mengenai krisis itu. Dr Mahathir dan Sultan Hassanal kali terakhir bertemu pada Disember di sidang kemuncak tidak rasmi kedua Asean di sini.

Negara-negara Asean sedang menimbangkan satu cadangan untuk berdagang menggunakan mata wang mereka berbanding dolar Amerika yang lebih kukuh.

Dr Mahathir telah mengadakan misi lawatan serupa baru-baru ini ke Thailand, Filipina dan Singapura.

Dr Mahathir dan rakan sejawatannya dari Singapura Goh Chok Tong dalam satu pernyataan bersama hari ini berkata kedua-dua negara bersetuju untuk bekerjasama antara satu sama lain dan juga bersama rakan-rakan Asean yang lain bagi mengembalikan kestabilan mata wang serantau. -- BERNAMA

RAZ RON